

Universitätsbibliothek Paderborn

Medvlla Theologica

Ex Sacris Scriptvris, Conciliorvm Pontificvmqve Decretis, Et Sanctorvm
Patrvm Ac Doctorum Placitis Expressa ; In qua, quidquid tum ad fidei
mysteria sanè ac rectè intelligenda, & ab erroribus quibusvis secernenda,
tum ad sacramenta debitè conficienda & ministranda, tum ad actiones
humanas iuxta ...

Abelly, Louis

Coloniæ Agrippinæ, 1658

VII. An vnuſ possit alteri mereri primam gratiam, & alia dona ad salutem
necessaria.

urn:nbn:de:hbz:466:1-38954

SECTIO VII.

*An unus posset alteri mereri primam gratiam,
& alia dona ad salutem necessaria.*

Questio intelligi debet de puro homine; certum est enim Christum Dominum potuisse ratione unionis hypotheticæ de condigno pro alijs mereri, & de facto nobis quascunque gratias fuisse promeritum, ut in tract. de Incarn. diximus. Intelligi etiam debet secundum legem Dei ordinariam, & posito rerum statu, qui nunc est; quia nihil repugnat, si Deus ita vellet, talen ac tantam gratiam puro homini concedi, ut accedente praesertim Dei pacto, & promissione, non tantum sibi, sed etiam alijs mereri aliquid de condigno posset.

Hac observatione præmisâ, pro questionis proposita resolutione dicendum 1. purum hominem nullam posse gratiam alteri de condigno promereri. Ita S. Th. q. 114. a. 6. probatur ex eo, quod dicitur 2. Cor. 5, & passim in alijs scripturarum locis, vnumquemque recepturum, prout egerit ipse, non alter pro eo; unde S. Hier. in cap. 25. S. Matth. *Vnuquisque, inquit, pro operibus suis mercedem accipiet:* & S. Aug. tractat. 102. in S. Ioann. explicans hæc Christi Domini verba: *Si quid petieritis Patrem in nomine meo, dabit vobis. Exaudiuntur, inquit, omnes Sancti pro seipsis, non autem pro omnibus exaudiuntur, vel amicis, vel inimicis suis, vel quibuslibet alijs; quia non utcunq; dictum est (dabit) sed dabit vobis.*

Dicendum 2. posse vnum alteri primam gratiam aliquæ dona de congruo mereri. Constat imprimis ex scriptura. Iob. 42. *Iob seruus meus orabit pro vobis; faciem eius suscipiam, ut non vobis imputetur stultitia:* S. Jacob. 5. *Orate pro inuicem, ut saluemini.* Constat deinde ex praxi vniuersitatis Ecclesiæ, in qua hæc pia consuetudo semper viguit, ut fideles pro inuicem orarent; unde S. Aug. serm. 90. de diversis c. 10. *Si martyr Stephanus non orasset, Ecclesia Paulum hodie non haberet.*

Est autem hic obseruandum, vnum alteri primam gratiam sanctificantem, aut illius augmentum nō aliter mereri etiam de congruo posse, nisi in quantum meretur illi gratias actuales, aut alia media, quibus ad illam gratiam aut eius augmentum disponatur, vt autem eiusmodi sequatur effectus, opus est, vt is, qui pro altero meretur, opus illud bonum, quo meretur, saltem interpretatiū referat ad hunc finem: requiritur etiam præterea, vt is, in cuius gratiam opus illud bonum dirigitur, nullum eius effectui obicem ponat.

Porrò cùm hoc meritum (sicut diximus) quādam solum congruentiā & conuenientiā, non verò vllā Dei promissione innitatur, fieri etiam aliquando potest, vt effectum suum non consequatur, cùm possint esse aliæ rationes, ob quas magis conueniens sit, vt Deus bona illa non conferat, quæ vnum alteri impetrare ac promererit intendit; hinc apud Ierem. cap. 51. dicebat Deus: *Si fuerit Moyses & Samuel coram me, non est anima mea ad populum istum.*

Atque haec tenus de gratia diuina eiusq[ue] effectibus,
ad ipsius gratiæ omniumq[ue] eius effectuum
authoris, & largitoris maiorem gloriā.

F I N I S.